

宋史新編

宋史新編卷一百二

列傳四十四

明南京戶部主事莆田柯維騏著

歐陽脩

子發棐

劉敞

弟敞
子奉世

曾鞏

弟鞏
孫孫志

歐陽脩字永叔廬陵人四歲而孤母鄭守節親誨之學
家貧至以荻畫地學書幼敏悟過人及冠疑然有聲宋
興且百年文章體裁猶仍五季餘習鏤刻駢偶澁弗
振士因陋守舊論卑氣弱蘇舜元舜欽柳開穆脩輩咸
有意作而張之而力不足脩慕唐韓愈所爲文苦志探
蹟至忘寢食必欲弁轡絕馳而追與之並舉進士試南
宮第一擢甲科調西京推官從尹洙游爲古文議論當

世事迭相師友與梅堯臣爲歌詩相倡和遂以文章名
冠天下入朝爲館閣校勘貽書責司諫高若訥不論救
范仲淹語在若訥傳若訥上其書貶夷陵令慶曆三年
由集賢校理知諫院初尹洙余靖皆以直仲淹與脩同
見逐目之曰黨人自是朋黨之論起脩乃爲朋黨論以
進謂小人無朋惟君子則有之退小人之僞朋用君子
之真朋則天下治矣脩論事切直人視之如讎帝獨獎
其敢言面賜五品服顧侍臣曰如歐陽脩者何處得來
同脩起居注不待試卽除知制誥奉使河東自西方用
兵議者欲廢麟州以省餽餉脩曰麟州天險不可廢

是州得存又言忻代豈嵐多禁地廢田願令民得耕
不然將爲敵有朝廷下其議久乃行歲得粟數百萬斛
使還會保州兵亂以爲龍圖閣直學士河北都轉運使
方是時杜衍等相繼以黨議罷去脩慨然上疏曰杜衍
韓琦范仲淹富弼天下皆知其有可用之賢而不聞其
有可罷之罪自古小人讒害忠賢不過指爲朋黨欲動
搖大臣必須誣以顯權正士在朝羣邪所忌謀臣不用
敵國之福也於是邪黨益忌脩因其孤甥張氏欲傳致
以罪左遷知制誥知滁州居二年徙揚州潁州復學士
留守南京母憂服除召判流內銓時在外十二年矣帝

見其髮白問勞甚至小人畏脩復用有詐爲脩奏乞澄汰內侍爲姦利者其羣皆怨怒譖之出知同州帝納吳充言而止遷翰林學士俾脩唐書奉使契丹其主聞其名加尊禮焉知嘉祐二年貢舉時士子尚爲險恠奇澀之文號太學體脩痛排抑之旣畢事向之鄙薄者伺脩出聚謀於馬首街邏不能制然場屋之習從是遂變加龍圖閣學士知開封府承包拯威嚴之後簡易循理不求赫赫名京師亦洽旬月改群牧使唐書成拜禮部侍郎兼翰林侍讀學士脩在翰林八年知無不言河決商胡賈昌朝欲開橫隴故道回河使東流有李仲昌

導入六塔河脩竝以爲不可語在河渠志宰相陳執
主昌朝文彥博主仲昌竟爲河北患執中被論猶遷
固位脩上䟽請罷之樞密使狄青有威名帝不豫訛言
籍籍脩請出之以保其終皆從之帝在位乂而儲嗣未
立脩嘗因水災上䟽曰昔漢文帝初卽位以羣臣之言
卽立太子而享國長乂爲漢太宗唐明宗惡人言儲嗣
事不肯早定致秦王之亂宗社遂覆陛下何疑而乂不
定乎旣由樞密副使拜參知政事與韓琦同心輔政遂
協定大議語在琦傳英宗以疾未親政皇太后垂簾左
右交構幾成嫌隙太后泣語琦琦以帝疾爲解太后意

不釋脩進曰昔溫成之寵太后處之裕如今母子之間反不能容邪太后意稍和脩復曰仁宗在位久德澤在人故一日晏駕天下奉戴嗣君無一人敢異同者今太后一婦人臣等五六書生耳非仁宗遺意天下誰肯聽從太后默然久之而罷脩平生與人盡言無所隱及執政士大夫有所干請輒面諭可否雖臺諫官論事亦必以是非詰之以是怨誹益衆帝將追崇濮王脩引喪服記以爲爲人後者爲其父母服降三年爲期而不沒父母之名以見服可降而名不可沒也若本生之親改稱王伯歷考前世皆無典據進封大國則又禮無加爵

道故中書之議不與衆同於是御史呂誨等詆脩主議爭論不已皆被逐惟蔣之奇之說合脩脩薦爲御史衆目爲姦邪之奇患之思所以自解脩婦弟薛宗孺有憾於脩造帷薄不根之謗摧辱之辰轉達於中丞彭思永思永以告之奇之奇卽上章劾脩神宗初卽位欲深護脩訪故宮臣孫思恭思恭爲辨釋脩杜門請推治帝使詰思永之奇問所從來辭窮皆坐黜脩亦力求退罷爲觀文殿學士刑部尚書知亳州明年遷兵部尚書知青州改宣徽南院使判太原府辭不拜徙蔡州脩以風節自持旣數被汙讎連乞謝事帝輒優詔弗許及守青

州又論青苗爲安石所詆故求歸愈切熙寧四年以太
子少師致仕明年卒年六十六贈太子太師謚文忠脩
始在滁州號醉翁晚號六一居士天資剛勁見義勇爲
雖機罪在前觸發之不顧放逐流離至于再三志氣自
若也學者求見所與言未嘗及文章惟談吏事謂文章
止於潤身政事可以及物凡歷數郡寬簡不擾所至民
便之嘗曰以縱爲寬以略爲簡則政事弛廢而民受其
弊吾寬不爲苛意簡不爲繁碎耳母嘗謂曰汝父爲吏
常夜燭治獄書求其生不得則廢書而嘆脩聞而服之
終身其爲文天才自然豐約中度簡而明信而通引物

連類折之於至理超然獨鶩衆莫能及故天下翕然
尊之獎引後進如恐不及賞識之下率爲聞人曾鞏王
安石蘇洵及子軾轍布衣屏處未爲人知脩卽游其聲
譽謂必顯於世篤於朋友生則振掖之死則調護其家
好古嗜學搜輯周漢以降金石遺文研稽異同立說於
左的可表證謂之集古錄自撰五代史記法嚴詞約
多取春秋遺旨蘇軾敘其文曰論大道似韓愈論事似
陸贄記事似司馬遷詩賦似李白識者以爲知言子發
字伯和少好學師事胡瑗得古樂鐘律之說不治科舉
文詞獨探古始立論議以恩補將作監主簿賜進士出

身累遷殿中丞卒年四十六蘇軾謂發得文忠公之學
漢伯喈晉茂先之流也中子棐字叔弼亦博學能文用
蔭爲祕書省正字登進士乙科調陳州判官以親老不
仕親終始爲審官主簿累遷職方員外郎知襄州曾布
執政其婦兄魏泰倚聲勢來居襄規占公私田園莫敢
誰何至是指州門東偏官邸廢址爲天荒請之棐竟持
不與泰怒譖於布徙知潞州旋罷去元符末還朝歷吏
部右司二郎中以直祕閣知蔡州未幾坐黨籍廢
論曰歐陽脩文章學唐韓愈蘇軾推其衛道之功與
竝然觀其著論升羸秦曹魏朱梁於正統豈得春秋

旨童子問斥繫詞易道殆未深究也其主議漢王典禮尤爲當時所非而脩自謂援據禮經俟百世而不惑晚年作五代史於晉出帝父敬儒周世宗父柴守禮皆有論說發明父子之倫甚悉無乃護其前議耶

劉敞字原父新喻人第進士通判蔡州直集賢院判尚書考功仁宗賜夏竦謚文正敞言謚者有司之事竦行不應法今百司各得守其職而陛下侵臣官疏三上改謚文莊中貴人預定大樂敞諫儒學滿朝辨論有餘而使若趙談者參之臣懼爲袁盎笑也歷同脩起居注未一月擢知制誥宦者石全彬領觀察使意不愜有愠言

居三日爲真敞封還除書不草制奉使契丹順州山中
有異獸如馬食虎豹契丹不能識問敞敞曰此所謂駁
也爲說其狀且誦山海經管子書曉之契丹益歎服使
還求知揚州狄青起行伍爲樞密使每出入小民輒聚
觀相與推誦其拳勇至墜馬足不得行帝不豫人心動
搖青益不自安敞辭赴郡爲帝言陛下幸愛青不如出
之以全其終帝領之使出諭中書青乃去位天長縣鞠
王甲殺人敞曰寃也相傳以爲神明徙鄆州先是久旱
地多蝗敞至而雨蝗出境召糾察在京刑獄嘉祐祫享
羣臣上尊號宰相請撰表敞上疏曰今歲來頗有災異

當深自抑損帝嘉納蜀人龍昌期著書以詭僻惑衆
彥博薦諸朝賜五品服敞與歐陽脩俱曰學非而博士
制必誅又何賞焉敞以識論與衆忤求知永興軍拜翰
林侍讀學士召判三班院英宗初立兩宮方有間敞進
讀史記至堯授舜以天下拱而言曰舜至側微堯禪以
位天地享之百姓戴之非有他道惟孝友之德光于上
下耳帝爲改容知其以義理諷也皇太后聞之亦大喜
積苦眩瞶屢予告疾少間復求外以爲汝州旋改集賢
院學士判南京御史臺卒年五十敞學問淵博佛老卜
筮天文方藥山經地志皆究大略朝廷有禮樂之事必

就其家取決焉爲文贍敏掌外制時將下直會追封王
主九人立馬却坐頃之九制成歐陽脩每有疑問對使
揮筆答之長於春秋爲書四十卷弟攸子奉世

攸字貢父與敞同登科仕州縣者二十年始爲國子監
直講熙寧中判尚書考功同知太常禮院建白多施行
王安石在經筵乞坐講攸曰避席立語古今常禮君命
之坐所以示人主尊德樂道也若不命而請則異矣禮
官咸同其議後皆仍之考試開封舉人與同院王介甫
晉坐劾罷禮院延試始用策考官呂惠卿列阿時者高
等許直者居下攸覆考悉反之又嘗詒安石書非新法

安石怒斥通判泰州又知曹州曹爲盜區重法不能止
攷曰民不畏死奈何以死懼之治尚寬平盜亦衰息歷
京東轉運使徙知兗亳二州吳居厚代爲轉運使能奉
法令致財賦追坐攷廢弛黜之哲宗初起知襄州入爲
祕書少監以疾求去加直龍圖閣知蔡州給事中孫覺
等言攷博記能文章政事倖古循吏身兼數器守道不
回宜優賜之告留京師至蔡數月召拜中書舍人竟以
疾不起年六十七攷著書百卷尤邃史學作東漢刊誤
預脩資治通鑑爲人踈儻不脩威儀喜諧謔數招怨悔
奉世字仲馮第進士累官直史館國史院編脩官以忤

蔡確謫後歷樞密直學士簽書院事章惇當國奉世乞
免去紹聖初以端明殿學士知成德軍改定州踰年知
成都府過都入覲欲述朋黨傾邪狀曾布言於帝曰元
祐變先朝法奉世最爲漏網恐不足見明年責光祿少
卿分司南京居郴州邪恕又劾之再貶隰州團練副使
徽宗立還其官歷知數州崇寧初再奪官責居沂兗赦
歸後復端明學士卒年七十三奉世性簡重治尚安靜
文詞雅贍亦精漢書學常云得喪常理譬如寒暑加人
雖善攝生者不能無病正須安以處之

曾鞏字子固南豐人幼警敏能文甫冠名聞四方登嘉

祐二年進士第歷集賢校理爲實錄檢討官出通判
州知齊襄洪三州皆有異政加直龍圖閣知福州福無
職田歲鬻園蔬自入常三四十萬輦謂太守不宜與民
爭利罷之後至者亦不復取也徙明毫滄三州輦久外
徙世頗謂偃蹇不偶一時後生輩鋒出輦視之泊如也
過闕神宗召見勞問甚寵留判三班院疏議經費以節
用爲理財之要帝稱善帝欲合累朝國史爲一書加輦
史館脩撰專典不以大臣監總旣而不克成會官制行
拜中書舍人尋掌延安郡王牋奏居母憂卒年六十五
輦性孝友父亡奉繼母益至撫四弟九妹於委廢單弱

中宦學婚嫁一出其力爲文章上下馳騁本原六經斟酌於司馬遷韓愈時鮮能過也少與王安石游安石聲譽未振輦導之於歐陽脩及安石得志遂與之異神宗嘗問安石何如人對曰安石文學行義不減揚雄以客故不及帝曰安石輕富貴何客也曰勇於有爲吝於改過耳呂公著嘗告神宗以輦行義不如政事政事不如文章故不大用云弟布在姦臣傳幼弟肇孫恣

肇字子開第進士歷同知太常禮院太常自秦以來禮文殘缺親祠皇地祇於北郊蓋自肇發之兄布以論市易被責亦奪肇主判再遷右司郎中爲神宗實錄檢討

元祐初擢中書舍人論葉康直知秦州不當執政訐
先白御史因攻之肇求去范純仁力言於朝曰若善人
不見容吾輩不可居此矣乃得釋蔡確貶新州肇先與
汝礪約極論會除給事中汝礪獨封還制書言者謂肇
賣友略不自辨以寶文閣待制知潁州徙鄧齊陳州應
天府入爲吏部侍郎是歲當郊肇堅抗前說旣而合祭
天地乃自劾改刑部請不已出知徐州徙江寧府帝親
政更用舊臣數稱肇議禮趣入對肇言宜選忠信端良
之士寘諸近班以參謀議備顧問與夫深處法宮親近
謖御其損益相去萬萬貴近惡其語出知瀛州與兄布

易地時方治實錄譏訕罪降爲滁州稍復集賢殿修撰
歷泰州海州徽宗立復召爲中書舍人日食四月朔當
降詔求言肇具述帝旨詔下投匭者如織章惇惡之欲
因事去肇帝不聽遷翰林學士兼侍讀布拜相肇適當
制國朝學士弟草兄制唯韓維與肇爲衣冠榮建中靖
國元年太史奏日又當食四月肇請對言比歲日食正
陽咎異章著陛下宜痛自克責以塞天變言發涕下帝
悚然順納只布在相位引故事避禁職拜龍圖閣學士
提舉中太一宮未幾出知陳州歷太原應天府揚定二
州崇寧初落職連貶濮州團練副使安置汀州四年

潤卒年六十一自熙寧以來四十年大臣更用事邪
相軋黨論屢起肇身更其間數不合尤布與韓忠彥並
相日夕傾危之聲旣居外移書告之曰兄方得君當引
用善人翹正道以杜惇卞復起之萌而數月以來所謂
端人吉士繼跡去朝所進以爲輔佐侍從臺諫往往皆
前日士異時惇卞縱未至一蔡京足以兼二人可不深
慮布不能從未幾京得政布與肇俱不免肇天資仁厚
而容貌端嚴自少力學爲文溫潤有法更十一州多善
政紹興初謚文昭子統左諫議大夫孫悟

忘字仲常以蔭累司農丞通判溫州需次于越建炎三

年金人陷越志被執見其帥琶八辭氣不屈且數其叛盟欺天罪於是家屬四十口同遇害

悟字蒙伯登進士第靖康間爲亳州士曹金人破亳州悟被執抗辭慢罵衆刃廟之妻孥同日被害

論曰劉敞剛正之氣發而爲嘉謀忠言扶國是而動主聽奚但醢藉之足多乎攷有兄之風未免失之疎曠昔人謂盡飾之道惡可廢耶曾鞏與肇並優儒術精吏治鞏尤善文章追當時歐陽子與之齊驅三蘇諸人勿論也假令仲也作相世弗與姦邪者比其家聲不爲當代冠哉

蔡襄

呂溱

王素

從子

余靖

彭思永

張存

何郊

吳中復

從孫

蔡襄字君謨仙遊人第進士爲西京留守推官館閣校勘范仲淹以言事去國余靖論救之尹洙請與同貶歐陽脩移書責司諫高若訥由是三人者皆坐譴襄作四賢一不肖詩都人士爭傳誦契丹使購於鬻書之肆以歸慶曆三年仁宗更用輔相親擢靖脩及王素爲諫官襄知諫院襄喜言路開慮正人難久立上疏曰任諫非難聽諫爲難聽諫非難用諫爲難三人忠誠剛正必能

盡言臣恐邪人不利必造爲禦之之說其說不過有三
臣請辨之一曰好名夫忠臣引君當道論事唯恐不至
若避好名之嫌無所陳則土木之人皆可爲矣二曰好
進前世諫者之難激於忠憤遭世昏亂死猶不辭何好
進之有近世獎拔太速但久而勿遷雖死是官猶無悔
也三曰彰君過諫爭之臣蓋以司過舉耳人主聽而行
之足以致從諫之譽何過之能彰至於巧者亦然事難
言則暗而不言擇其無所忤者時一發焉猶或不行則
退而曰吾嘗論其事矣此之謂好名默默容容無所媿
恥躡資累級以挹顯仕此之謂好進君有過失不效之

於未然傳之天下後世其事愈不可掩此之謂彰君過
願陛下察之母使有好諫之名而無其實時有旱蝗日
食地震之變襄謂災害之來由君臣上下皆有闕失詔
甚激切進直史館兼脩起居注襄益任職論事無所回
撓開寶浮圖災下有舊瘞佛舍利詔取以入宮人多灼
臂落髮者方議復營之襄諫謂陛下當脩人事奈何專
信佛法彼所居尚不能護何有於威靈夏竦罷樞密使
韓琦范仲淹竝在位襄言陛下此舉人士莫不相慶然
臣切憂之天下之勢譬猶病者陛下既得良醫矣信任
不疑非徒愈病而又壽民醫雖良術不得盡用則病且

日深保州卒作亂戕官吏已而推懦兵十餘輩爲首惡殺之以求招撫襄謂不可開驕慢暴亂之源詔盡誅之以毋老求知福州改福建路轉運使開古五塘溉民田奏減五代時丁口稅之半復脩起居注唐介擊宰相觸盛怒襄趨進請全貸旣貶春州又上疏謂必死之謫得改英州進知制誥除授非當職輒封還帝遇之益厚賜其毋冠帔以示寵又親書君謨兩字遺襄遷龍圖閣直學士知開封府襄精吏事談笑剖決破姦發隱吏不能欺以樞密直學士再知福州徙知泉州距州二十里萬安渡立石爲梁其長三百六十丈種礪於礎以爲固至

今賴焉又植松七百里以庇道路閩人刻碑紀德召翰林學士三司使英宗不豫皇太后聽政爲輔臣言先帝旣立皇子宜妾更加熒惑而近臣知名者亦然幾敗大事近已焚其章矣已而外人遂云襄有論議帝聞而疑之會襄數謁告因命擇人代襄襄乞爲杭州拜端明殿學士以往未幾居母憂卒年五十六贈吏部侍郎襄工於書仁宗愛之命書元舅隴西王碑其溫成后父碑則辭曰待詔職也篤於朋友聞其喪不御酒肉爲位而哭乾道中諡忠惠孫佃仲俱登第仲二光有傳

呂濤字濟叔揚州人進士第一歷知制誥出知杭州入

爲翰林學士疏論宰相陳執中姦邪仁宗還其疏溱曰
願出以示執中未幾執中去溱亦以侍讀學士知徐州
賜宴資善堂詔自今由經筵出者視爲例徙成德軍溱
豪侈自放簡忽於事與都轉運使李參不相能還判流
內銓參劾其過貶秩知和州歷復集賢院學士加龍圖
閣直學士知開封府豪惡斂跡以病改樞密直學士提
舉醴泉觀遂卒年五十五贈禮部侍郎神宗詔優恤官
庀其葬以厲臣節溱開敏善議論名輩皆推許然自貴
重在杭州接賓客不過數語時目爲七字舍人云
王素字仲儀太尉旦季子也賜進士出身至屯田員外

郎孔道輔薦爲侍御史道輔貶出知鄂州仁宗擢知
院素方壯年遇事感發適皇子生將進百僚官頒諸軍
賞素爭曰西夏畔渙契丹要求縣官之須且日急矣宜
留爵秩以賞戰功儲金繒以佐邊費議遂已王德用進
二女子素論之帝曰朕真宗皇帝之子卿王旦之子有
世舊非他人比也德用實進女然已事朕左右奈何素
曰臣之憂正恐在左右爾帝動容立命遣二女出賜素
銀緋擢天章閣待制淮南都轉運按察使素不摘細故
卽有貪刻必繩治窮竟以故下吏愛而畏之改知渭州
以市木河東降華州又奪職徙汝俄悉還其故遷龍圖

閣直學士以樞密直學士知開封府出知定州成都府
凡爲政務合人情蜀人紀其目號曰王公異斷復知開
封素少知名出入侍從將帥久頗鞅鞅厭倦劇煩事多
鹵莽不治盜賊數發坐劾出知許州治平初夏人寇靜
邊砦召拜端明殿學士復知渭州於是三鎮涇原蕃夷
故老皆歡賀比至敵解去換澶州觀察使知成德軍改
青州觀察使熙寧初還以學士知太原府汾河大溢素
亟命具舟楫築堤捍之一夕水驟至人賴以安入知通
進銀臺司轉工部尚書仍故職致仕故事雖三公致仕
亦不帶職朝廷方新法制素首以學士就第卒年六十一

七謚懿敏子輩從子靖從孫震輩長於詩從蘇軾游軾
守滁輩往訪之與客遊泗水登颺山吹笛飲酒乘月而
歸軾待之於黃樓上謂曰李太白死世無此樂三百年
矣軾得罪輩亦竄賓州數歲得還豪氣不少挫後歷宗
正丞以跌蕩傲世爲時議所短故終不顯靖字詹叔蚤
孤自力於學好講切天下利害以蔭歷太常少卿直昭
文館知廣州入爲度支副使卒子古字敏仲第進士歷
遷戶部侍郎詳定役法與蔡京多不合詔徙古兵部歷
戶部刑部尚書攻不已以寶文閣直學士知成都坐黨
籍責衡州別駕安置溫州復朝散郎尋卒

震字子發以父任試銓優等賜及第歷龍圖閣直學士
知開封府震與章惇皆呂惠卿所薦而素不相能府奏
獄空哲宗疑不實震謂惇抑已會頴昌蓋漸有訟許賂
惇子弟震捕治頗得蹤跡惇懼以獄付大理徙震樞密
都承旨遂坐折獄滋蔓傾搖大臣奪職知岳州卒

余靖字安道曲江人少不事羈檢以文學稱鄉里第進
士起家爲贛縣尉試書判拔萃改將作監丞知新建縣
遷祕書丞建言班固漢書舛謬命與王洙并校司馬遷
范曄二史擢集賢校理范仲淹以言事貶靖言汲黯在
廷以平津爲多詐張昭論將以魯肅爲粗疎漢皇吳主

熟聞訾毀兩用無猜豈損令德陛下自親政以來屢
言事者恐鉗天下口䟽入落職監筠州酒稅歷遷校理
同知禮院慶曆中帝銳意欲更弊事增諫員使論得失
以靖爲右正言進脩起居注靖論夏竦姦邪不可爲樞
密王舉正不才不宜在政府狄青武人不宜獨守渭州
張堯佐以脩媛故除提點府界公事非政事之美太常
博士王翼西京治獄還賜五品服靖曰嘗有工部郎中
呂覺以治獄祈易章綬陛下諭之曰朕不欲因鞫囚與
人恩澤陛下前日諭覺是則今日賜翼非矣小人望風
希進無所不至幸陛下每於事端抑其奔競其說多見

納擢知制誥元昊既歸款朝廷欲加封冊而契丹以兵臨西境來言爲中國計賊請毋和朝議難之會靖數言契丹挾詐不可輕許卽遣靖往報卒屈其議而還朝廷遂發夏用臣元昊西師既解嚴北邊亦無事靖三使契丹亦習外國語嘗爲番語詩爲御史所劾出知吉州靖累劾太常博士茹孝標匿喪坐廢靖旣失勢孝標詣闕言靖少遊廣州犯法受榜靖聞之不自得求侍養去改將作少監分司南京居曲江再遷衛尉卿知虔州丁父憂去儂智高反朝廷方顧南事就喪次起靖祕書監知潭州改桂州詔以廣南西路委靖經制旣而朝廷遣

青孫沔將兵共討賊賊平遷尚書工部侍郎初青戶
至前戒部將勿戰靖迫鈐轄陳曙出鬪敗走青至按軍
法斬曙及指使袁用等於坐靖瞿然起拜及諸將班師
獨留靖廣西擒智高母子弟三人生致闕下加集賢院
學士徙知潭州又徙青州交趾蠻寇邕州以靖安撫廣
西知廣州官至工部尚書代歸卒年六十五贈刑部尚
書諡襄靖嘗夢神人告以所終官而死秦亭故靖常畏
西行及卒則江寧府秦淮亭也

彭思永字季長廬陵人第進士歷侍御史皇祐祀明堂
將進百官秩時張堯佐已貴覲執政王守忠已寵求旄

節命未出思求抗疏曰陛下覃此謬恩豈爲天下孤寒
哉不過爲堯佐守忠取悅衆人耳外戚秉政宦侍用權
非社稷福也仁宗怒中丞郭勸諫官吳奎爲之請乃以
汎恩轉司封員外郎解臺職爲湖北轉運使累遷御史
中丞濮王稱親之議言者爭之皆斥去思求更上疏極
論二親之嫌英宗欲施行而中書持甚力卒不果神宗
卽位御史蔣之奇糾歐陽脩陰事挽思求自助思求以
爲帷薄之私非外人所知但其首建濮議違典禮以犯
衆怒不宜更在政府詔問語所從來思求不肯對而極
陳大臣專恣朋黨乃出知黃州改太平州以戶部侍

致仕卒年七十一思永仁厚廉恕爲兒時旦起就學
金釵於明外默坐其處須臾亡釵者來物色審之良是
卽付之始就舉持數釧爲資同舉者過之出而玩或墜
其一於袖間衆相爲求索思永曰數止此耳客去舉手
揖釧墜于地衆服其量居喪窶甚鄉人餽之無所受子
衛亦孝謹以父老棄官家居十餘年

張存字誠之冀州人第進士爲安肅軍判官天禧中詔
銓司以身言書判取士才得二人存預其選改著作佐
郎知朝城縣屢薦爲殿中侍御史遷侍御史仁宗初親
政罷百官轉對存請復之又言曹脩古輩忤旨廢黜布

衣林獻可上封事竄惡地恐自今忠直之言與夫理亂安危之機蔽而不達因歷引周昌朱雲辛慶忌辛毗事以開帝意歷京東陝西河北轉運使戶部度支副使西邊動兵以天章閣待制爲陝西都轉運使黃德和之誣劉平也存奏言身旣陷沒又爲讒狡所困邊臣自此無復死節矣朝廷采其說遷龍圖閣直學士知延州以母老憚行徙澤州還爲待制踰年知成德軍復學士契丹與元昊結昏陰謀相首尾聚兵塞上而求關南存言河北城久不治宜留意乃以爲都運使盡城諸州入知開封府復使河北三則反坐失察降知汀州歷吏部侍郎

致仕凡十五年積遷禮部尚書存性孝友收恤宗屬聘窮嫠不使一人失所家居矜莊子孫非正衣冠不見與賓友燕接垂足危坐終日未嘗傾倚卒年八十八謚恭安

何郯字聖從成都人第進士由太常博士爲監察御史轉殿中侍御史言事無所避楊懷敏以衛卒之亂猶爲副都知郯與魚周詢論之仁宗召諭云懷敏實先覺變宜有所寬假郯等皆言不可卒出之郯爭辨尤力帝曰古有碎首諫者卿能之乎對曰君不從諫則臣有碎首陛下受諫如流臣何敢掠美歸過君父帝欣納之夏竦

負罪不去郟等奏出知河南竦乞留京師郟奏復上竦
遂行時詔羣臣陳左右朋邪中外險詐久而無所行郟
請閱實其是否因言曰誠與疑治亂之本也君臣交疑
而欲天下無否塞之患不可得矣都知王守忠以脩祭
器勞遷景福殿使給兩使留後奉又詔許如正班守忠
移閣門欲綴本品坐宴郟極論之知雜御史闕帝越次
用之郟遍歷三院有直聲晚節頗回畏因地震言陰盛
臣強以譏切韓琦又乞召還王陶以迎合上意由是聲
名損於御史時以母老求西歸乃以知漢州人知梓州
擢至天章閣待制還判銀臺司唐介出荆南敕過門

郊封還之介復留諫院遷龍圖閣直學士爲河東都轉運使歷知永興河南治平末再知梓州居三年老而病猶乞進用神宗薄之詔提舉成都玉局觀從臣外祠自此始遂以尚書右丞致仕卒年六十九

吳中復字仲庶永興人父仲舉仕李煜爲池陽令嘗殺曹彬所招使者城陷被執曰世祿李氏國亡宜死彬義而不殺中復進士及第知峨眉縣代還不載一物通判潭州御史中丞孫抃薦爲監察御史初不相識也或問之抃曰昔人恥爲呈身御史今豈有識而臺官耶遷殿中侍御史彈宰相梁適適罷中復亦通判虔州未至復

還臺當弼主李仲昌開六潔河內臣劉恢密告所斷岡
與國姓上名同賈昌朝陰助之欲以搖弼詔中復往治
促行甚急中復馳至較其名乃趙征村也亦無岡勢欲
得止又彈宰相劉沆沆罷改右司諫同知諫院遷至龍
圖閣直學士知江寧府歷成德軍成都府永興軍河北
行青苗法拒不聽關內大旱民多流亡中復請加賑恤
執政惡之遣使往視謂不實削一階提舉王隆觀起知
荆南坐過用公使酒免卒年六十八從孫擇仁
擇仁字智夫以父任爲雅立主簿金水河隄壞諸縣皆
選屬危役得詣朝堂白事宰相范純仁獨異之知大肥

縣中貴人譚楨奴犯法按致於理楨羞恚造譖徽宗
戶部郎中宋喬年往鞫喬年伉吏也疾驅至不能得亭
毛罪笑謂擇仁曰來爲蔡君罪顧乃得一奇士遂薦之
召遷至集賢殿修撰爲京畿都轉運使拜戶部侍郎兼
知開封府宦官楊戩中以事出爲顯謨閣直學士知熙
州徙永興軍走馬承受藍從熙言其擅改茶法奪職免
再閱歲以徽猷閣待制領江淮發運還直學士知渭州
以病提舉崇福宮起知青州不克拜卒年六十六
論曰治辦之才易匡救之忠難君子多蔡襄諸人者獨
才乎哉王素余靖初不見容於朝旣而仁宗徵還與蔡

襄竝司言責擊官邪廟主躬各竭惓款斯不孤簡任矣
彭思永沮王守忠張堯佐何郟出夏竦楊懷敏吳中復
劾梁適劉沅張存請貸曹脩古林獻可亦皆克舉厥職
呂溱非諫官乃能暴陳執中之罪豈不以立朝循默為
可恥耶

宋史新編卷一百三

列傳四十五

明南京戶部主事莆田柯維騏著

鄭獬

陳襄

錢公輔

孫洙

呂誨

字由諱

劉述

劉琦

錢顗

鄭俠

鄭獬字毅夫安陸人爲文峭整舉進士第一歷官知制誥英宗立獬言昭陵制度不宜效乾興有傷儉德又言郡國馳表稱賀例官其人此五代餘習不可因仍以開僥倖皆不報又上疏言陛下所與共政者七八大臣焉能盡天下聰明願詔中外盡言至於臣下進見虛心詢

訪必能有益治道帝嘉納之出知荆南治平中大水求
言懈上䟽曰前世之君求諫者甚衆能用其言載於行
事者蓋鮮願陛下采羣臣章疏容而聽之無令徒掛牆
壁爲虛文而已還判三班院神宗召拜翰林學士朝廷
議納橫山懈曰兵禍必起於此已而种諤取綏州懈言
尊用變詐之士務爲掩襲如戰國暴君所尚豈帝王大
略哉又請因諒祚告哀遣使立其嗣予識者矐之權發
遣開封府斷謀殺欲不用按問新法爲王安石所惡以
侍讀學士出知杭州徙青州方散青苗錢懈言不忍民
無罪而陷憲綱引疾祈閒提舉鴻慶宮卒年五十一

陳襄字述古候官人少孤能自立出游鄉校與陳烈
希孟鄒穆爲友相與倡道海濱聞者皆笑以驚守之不
爲變卒從而化謂之四先生襄第進士調浦城簿攝令
事民有失物者捕偷兒至數輩相撐拄襄語之曰某廟
鐘能辨盜犯者捫之輒有聲乃率同列詣鐘所祭禱陰
塗以墨而以帷蔽之一人手無所汙遂服罪知河陽縣
始教民種稻富弼爲郡守禮遇之襄留意教事進縣子
弟於學或讒之於弼襄講說不少懈弼入相薦爲祕閣
校理判祠部歷知諫院改侍御史知雜事論青苗法乃
管商之術非聖世所宜行望貶斥王安石呂惠卿以謝

天下又乞罷韓絳政府以杜大臣爭利而進者且言韓維不當爲中丞皆不聽召試知制誥以言不行辭補外安石欲以爲陝西轉運使帝特留脩起居注襄懇辭手詔諭之乃就職踰年知制誥安石又欲出之帝不許尋直學士院安石益忌之擿書詔小失出知陳州徙杭州以樞密直學士知通進銀臺司兼侍讀判尚書都省卒年六十四贈給事中襄莅官以興學爲先平居以講求民間利病爲急旣亡篋有手書數十幅盈紙細書大抵皆民事也神宗嘗訪人材可用者襄以司馬光韓維呂公著蘇頌范純仁蘇軾至于鄭俠三子進人對謂純仁

公著不當久外謂俠竄瘴癘使得生還帝不能盡
錢公輔字君倚武進人少從胡翼之學中進士甲科歷
知制誥英宗卽位陳治平十議又作帝問一篇上之王
疇爲翰林學士未久擢副樞密公輔謂其望淺不草制
謫滁州團練使起知廣德軍神宗立歷知制誥又知諫
院宰相富弼謂曰上求治如飢渴正賴君輩同心以濟
答曰朝廷所爲是天下誰敢不同所爲非公輔欲同之
不可得已王安石雅與之善旣得志主薛向更鹽法出
滕甫於鄆州公輔數於帝前言向當黜甫不當去拂安
石意罷諫職旋出知江寧府明年帝欲召還安石沮之

但徙揚州以病乞越改提舉崇福觀卒年五十二

孫洙字巨源廣陵人羈北能文未冠第進士歐陽脩等

舉應制科進策五十篇指陳政體明白剴切韓琦讀而

嘆曰今之賈誼也再遷集賢校理知太常禮院治平中

求言洙疏時弊十七事後多施行兼史館檢討同知諫

院凡有章奏輒焚其藁神宗主王安石新法多逐諫官

御史洙知不可而鬱鬱不能有所言但力求補外得知

海州免役法行常平使者欲加斂取羸洙力爭之旱蝗

爲害致禱於胸山徹奠大雨蝗赴海死尋勾當三班院

同修起居注進知制誥帝獎其文自直學士院擢翰林

學士踰月得疾時參知政事闕帝將用之數遣中使
醫勞問洙小愈在家習肄拜跽債不能興於是竟卒年
四十九帝臨朝嗟悼常賻外賜錢五十萬洙博聞強識
明練典故出語皆成章雖對親狎未嘗發一鄙語文詞
典麗有西漢之風士大夫共以丞輔期之

論曰鄒衡之擢甲科也仁宗先期焚香祝天願得忠孝
狀元衡後來多獻納不肯詭隨以圖富貴謂之忠孝非
耶閔士自游楊以前鮮知性命之學陳襄挺出流俗力
爲之倡觀其論列權臣加意民間利病豈空談無用者
哉錢公輔孫洙皆神宗朝諫官也公輔忤王安石解職

洙噤不言及領方州爭免役晚矣

呂誨字獻可宰相端之孫性純厚力學不妄與人交登進士第歷殿中侍御史時廷臣多䟽訐人罪誨言臺諫許風聞言事非職侵官請詔懲革御藥供奉官四人遙領團練使御前忠佐當汰復留誨劾樞密使宋庠結援徇私詔罷庠而用陳升之爲副使誨又論之升之旣去誨亦出知江州時嘉祐六年也上䟽請登建皇嗣謂宸謀已定當使天下共知萬一有姦臣附會其間陽爲忠實以緩上心此爲患最大不可不察也召爲侍御史改同知諫院英宗不豫誨請皇太后日命大臣一員與淮

陽王視進藥餌都知任守忠用事又帝之立非守忠
數間謀東朝播爲惡言內外洵懼誨上兩宮書開陳大
義多人所難言者帝疾小愈遂論守忠罪并其黨史昭
錫竄之治平二年遷兵部員外郎兼侍御史知雜事濮
議稱皇伯與中書異誨七上章不聽乞解臺職亦不聽
遂劾宰相韓琦不忠五罪又與御史范純仁呂大防劾
歐陽脩首開邪議陷陛下於過舉皆不報已而詔濮王
稱親誨等知言不用卽上還告敕居家待罪且言與輔
臣勢難兩立帝以問執政脩曰若臣等有罪當留御史
帝猶豫久之乃下遷誨工部員外郎知蘄州神宗立歷

擢復知諫院拜御史中丞王安石執政時多謂得人誨
獨不以爲然著作佐郎章辟光上言岐王顥宜遷居外
邸皇太后怒帝令治其離間罪安石護之誨請下辟光
吏不從遂上疏劾安石曰大姦似忠大佞似信安石外
示朴野中藏巧詐陛下悅其才辨而委任之安石初無
遠略惟務改作立異罔上欺下文言飾非誤天下蒼生
必斯人也久居廟堂必無安靜之理辟光之謀本安石
及呂惠卿所導故力加營救願察於隱伏質之士論然
後知臣言之當否帝方注倚安石還其章誨求去帝謂
曾公亮曰若出誨恐安石不自安安石曰臣以身許國

陛下處之有義臣何敢以形跡自嫌苟爲去就乃出誨
知鄧州誨之將有言也司馬光勸止之誨曰安石好執
偏見輕信姦回喜人佞已聽其言則美施於用則踈置
諸宰輔天下必受其禍且上新嗣位所與朝夕圖議者
二三執政而已苟非其人將敗國事此乃腹心之疾救
之惟恐不逮顧可緩耶誨旣斥安石益橫光由是服誨
先見自以爲不及也明年改知河南旋以疾提舉崇福
宮表求致仕曰臣本無宿疾醫者用術乖方妄投湯劑
率任情意差之指下禍延四支一身之微固無足卹奈
凡族之託何蓋喻朝政也誨病困猶憤歎以天下事爲

憂旣革司馬光往省之目已瞑聞光哭靡然而起張曰
強視曰天下事尚可爲君實勉之光曰更有以見屬乎
曰無有遂卒年五十八贈通議大夫季子由誠

由誠字子明以蔭歷通判成都府知雅絲溫嘉四州皆
有治績靖康初宰相唐恪薦召與恪議不合且憂其蓄
縮不足濟時艱力求退差知襲慶府時京東諸郡兵驕
多內訌由誠拊循有方士樂爲用一日金兵四集由誠
嚴立賞罰厲以忠義敵急攻矢石如雨人無叛志判官
趙令佳同心誓守城陷被執敵欲生降之由誠不屈乃
殺其子仍於前由誠不顧與令佳同遇害于僕奔家獨

四十口皆被執無生還者贈通奉大夫錄二子

劉述字孝叔湖州人第進士累官都官員外郎提點江西刑獄六年不奏考功課改荆湖等路轉運使再遷刑部郎中神宗立召爲侍御史知雜事又十一年不奏課帝知其久次授吏部郎中王安石爭謀殺刑名述兼判刑部駁之及敕下述封還中書奏執不已安石白帝詔開封府推官王克臣劾述罪於是述率御史劉琦錢顗共上疏曰安石執政未數月中外人情囂然胥動蓋以專肆胸臆輕易憲度無忌憚之心故也安石自應舉歷官尊尚堯舜之道以倡率學者及遭時得君乃首議財

利務爲容悅言行乖戾一至於此剛狠自任則又甚焉
豈宜處之廟堂以亂國紀願早罷逐以慰天下元元之
心曾公亮陰自結援以固寵趙抃括囊拱手但務依違
大臣事君豈當如是疏上安石奏先貶琦監處州鹽酒
務顓監衢州鹽稅司馬光上疏乞留不報開封獄具述
三問不承安石欲置之獄光又與范純仁爭之乃議貶
爲通判帝不許以知江州踰歲提舉崇禧觀卒年七十
二紹興初贈祕閣修撰

劉琦字公玉宣城人博學廣覽立志峻潔以都官員外
郎通判歙州召爲侍御史旣以言王安石貶終通判鄧

州年六十一

錢顓字安道無錫人知贛烏程二縣皆以治行聞治平末爲殿中侍御史裏行旣坐王安石貶將出臺於衆中責同列孫昌齡曰平日士大夫未嘗知君名徒以媚事王安石宛轉薦君得爲御史亦當少思報國奈何寧欲附會以求美官我視君犬彘之不如也卽拂衣上馬去後徙秀州家貧母老處之怡然蘇軾詩曰烏府先生鐵作肝世因目爲鐵肝御史卒年五十三

鄭俠字介夫福清人初隨父官江寧閉戶苦學遂受知王安石進士高第調光州司法參軍疑獄讞議安石悉

依奏俠感爲知己思欲盡忠秩滿徑入都時重試法安石以語俠俠以未習辭問所聞對曰青苗諸法與邊鄙用兵在俠心不能無區區也安石不答俠退不復見但數以書言新法之害久之監安上門方置修經局安石又欲辟爲檢討遣客諭意俠辭曰俠竊來求執經相君門下耳而相君發言持論無非以官爵爲先所以待士者亦淺矣果欲援俠而成就之取所獻利民便物之事行其一二使進而無阻不亦善乎俠因客又列民商苦免役未幾詔小夫裨販者免征重商十損其七他皆無所行是時自熙寧六年七月不雨至于七年三月東

流民每風沙霾暄扶攜塞道羸瘠愁苦身無完衣並

民買麻粃麥麩合米爲糜或茹木實草根至身被鎖械

而負瓦揭木賣以償官累累不絕俠繪所見爲圖奏疏

詣閣門不納乃假稱密急發馬遞上之銀臺司其略云

去年大蝗秋冬亢旱麥苗焦枯五種不入群情懼死方

春斬伐竭澤而漁草木魚鼈亦莫生遂願陛下開倉廩

賑貧乏取有司倍克不道之政一切罷去冀下召和氣

上應天心延萬姓垂死之命今臺諫充位左右輔弼又

貪徼近利便抱道懷識之士皆不欲與言陛下以爵祿

名器駕馭天下忠賢而使人如此甚非祖宗社稷之福

也竊聞南征北伐者皆以其勝捷之勢山川之形爲圖來獻料無一人以天下之民質妻鬻子斬桑壞舍流離逃散遑遑不給之狀上聞者臣謹以逐日所見繪成一圖但經眼目已可涕泣而况有甚於此者乎如陛下行臣之言十日不雨卽乞斬臣宣德門外以正欺君之罪疏奏神宗反覆觀圖長吁數四袖以入是夕寢不能寐翌日命罷青苗等法凡十八事民間謠叫相賀又下責躬詔求言越三日大雨遠近沾洽輔臣入賀帝示以俠所進圖狀且責之皆再拜謝安石上章求去外間始知其由羣姦切齒遂以俠付御史治其擅發馬遞罪呂惠

卿鄧綰言於帝曰陛下數年以來忘寐與食成此美政奈何一旦用狂夫之言悉罷廢相與環泣帝前於是新法一切如故安石去惠卿執政俠又上疏論之仍取唐魏徵姚崇宋璟李林甫盧杞傳爲兩軸題曰正直君子邪曲小人事業圖跡在位之臣暗合林甫輩而反於崇璟者各以其類復爲書獻之并言禁中有被甲登殿等事惠卿奏爲謗訕編管汀州御史臺吏楊忠信謁之曰御史緘默不言而君上書不已是言責在監門而臺中無人也取懷中名臣諫疏三帙授俠曰以此爲正人助惠卿暴其事且嗾御史張琥并劾馮京爲黨與俠道還

對獄惠卿議致之死帝曰俠所言非爲身也忠誠可嘉
豈宜深罪但徙英州哲宗立始得歸蘇軾孫覺表言之
以爲泉州教授元符七年再竄于英徽宗立赦還故官
又爲蔡京所奪自是不復出布衣糲食屏處田野然一
言一話未嘗忘君宣和元年卒年七十九里人揭其閭
爲鄭公坊州縣皆祀之於學紹熙初贈朝奉郎官其孫
嘉正

論曰呂誨三爲臺官三見黜其發王安石之姦於未露
雖富歐之知弗之及不特司馬也劉述錢顗劉琦並以
爭新法得罪其職宜然鄭俠小官乃能憂國家事疏論

群姦竄逐窮阨而不悔當時厚祿媿阿者何心哉

陳薦

王獵

孫思恭

周孟陽

齊恢

楊繪

劉庠

朱京

陳薦字彥升邢州沙河人第進士爲華陽尉從韓琦定
州河東幕府性木彊簡澹琦語人曰廉於進勇於退嫌
疑間毫髮不處與人交久而不變如彥升者無幾也琦
輔政薦爲祕閣校理判登聞檢院知太常禮院英宗諸
王出閣選爲記室參軍直集賢院神宗卽位自太子右
諭德進至知制誥知諫院論薛向謀取橫山功不就已
處以王恢之罪楊繪劾宰相曾公亮不宜罷諫職俱不

報除龍圖閣直學士河北都轉運使河決棗彊水官議於恩冀深瀛之間築堤三百六十里期一月畢工役夫八萬薦曰河未能爲數州害民方方困願以歲月爲之還判流內銓太常寺議學校貢舉法請會三年貢士數均之諸路計口察孝廉如漢制權主管御史臺坐論李定罷臺事又以議典禮不合出知蔡州召爲寶文閣學士兼侍讀進資政殿學士屢求退以爲本州命兩省燕餞資善堂擢其子厚爲御史臺主簿未幾提舉崇福宮卒年六十九贈光祿大夫

王徽字得之長垣人累應進士不第乃治生積錢旣而

歎曰此敗吾志也悉以班諸親族以范仲淹薦得出身
爲永興藍田主簿徙林慮令縣俗不知學獵立孔子廟
擇秀民誨之居官無絲髮擾吏民愛信共目爲清長官
入爲王宮教授歷諸王侍講英宗卽位拜天章閣待制
兼侍講方議濮王稱以問獵獵不可帝曰王待侍講厚
亦持此說邪對曰臣不敢以非禮名號加於王所以報
王也帝自是不復議神宗立進龍圖閣直學士求知襄
州未行改滑州以本曹侍郎致仕卒年八十

孫思恭字彥先登州人擢第後卽遭父喪不肯復從官
尋十年間纔三書吏考爲苑丘令轉運使以水災時調

春夫爭弗得乃棄官去吳奎薦補國子直講加祕閣校
理事神宗藩邸爲說書又爲侍講直集賢院及卽位擢
天章閣待制歐陽脩初不知思恭脩出政府思恭盡力
救解出知江寧府鄧州以疾移單州管幹南京留司御
史臺卒年六十一思恭精關氏易尤妙於大衍嘗修渾
儀者堯年至熙寧長曆近世曆數之學無有及之者
周孟陽字春卿海陵人第進士爲潭王宮教授諸王府
記室英宗居環列以其質厚禮重之及爲皇子堅臥不
出孟陽以爲言英宗曰非敢徼福以避禍也孟陽曰今
已有此跡設固辭不拜使中人別有所奉遂得燕安無

患乎意乃決帝卽位歷遷集賢殿修撰同判太常寺兼
侍讀神宗初立拜天章閣待制卒年六十九

齊恢字熙業蒲陰人唐宰相映之裔第進士歷宮僚拜
天章閣待制知通進銀臺司出知相州召知審官西院
糾察在京刑獄卒年六十六恢居鄉里恂恂稱君子臨
政明白簡約不苛擾所至人愛之贈工部侍郎

楊繪字公亮綿竹人少而奇警讀書五行俱下進士上
第歷知興元府神宗立召修起居注知制誥知諫院會
公亮請以其子判登聞鼓院用所厚曾鞏爲史官繪爭
曰公亮持國名器視如旦物帝爲寢其命繪亦解諫職

改兼侍讀繪固辭不拜未閱月復知諫院擢翰林學士
爲御史中丞時安石用事賢士多謝去繪言老成之人
不可不惜當今舊臣多引疾求去范鎮年六十有三呂
誨五十有八歐陽脩六十有五而致仕富弼六十有八
而引疾司馬光王陶皆五十求散地陛下可不思其故
乎又言方今以經術取士獨不用春秋宜令學者以三
傳解經免役法行繪陳十害安石使曾布疏其說詔繪
分析固執前議遂罷爲侍讀學士知亳州歷應天府杭
州再爲翰林學士議者欲加孔子帝號繪以爲非禮又
言不宜用遼曆改置閏悉從之御史蔡承禧言其私道

饋賂坐貶後歷天章閣待制再知杭州卒年六十二繪
爲吏敏強主愛利而受性踈曠訖以見斥然表裏洞達
一出於誠爲范祖禹所咨重有文集八十卷

劉庠字希道彭城人八歲能詩蔡齊妻以子用齊遺奏
補將作監主簿復登進士第爲高密廣平院教授英宗
求直言庠上書論時事帝嘉重之除監察御史裏行帝
不豫儲嗣未正庠拜䟽謂太子天下本漢文帝於初元
卽爲無窮計穎王長且賢宜亟立使日侍禁中閱四方
章奏帝行之神宗立遷殿中侍御史爲右司諫言中國
禦戎之策守信爲上昔元昊之叛五來五得志海內爲

之困弊今莫若示大信捨近功爲國家長利進天章閣待制河北都轉運使契丹侵霸州土場或言河北不可不備庠上五策料其必不動已而果然歷知開封府庠不肯屈事王安石安石欲見之戒典謁者勿納有語庠者曰王公意如此盍一往見庠謂見之何所言自彼執政未嘗一事合人情脫問青苗免役將何辭以對竟不往奏論新法神宗諭之曰奈何不與大臣協心濟治乎庠曰臣知事陛下不敢附安石會與蔡確爭廷參禮遂以爲龍圖閣直學士知太原府又知成都府乞禁西山六川與漢人婚姻勿詣土蕃取維州之害徙秦州坐失

舉降知虢州累徙永興軍元祐初加樞密直學士知開
州年六十四卒宣仁聞而惜之庠有吏能淹通歷代史
卒後蘇頌論庠治平建儲功錄其子

朱京字世昌南豐人父軾有隱德京博學淹貫登進士
甲科教授亳州應天府入爲太學錄神宗數召見論事
擢監察御史時中丞及同僚多罷去京抗疏曰御史假
之則重略之則輕今耳目之官屢進屢卻則言者不若
靜默爲賢直者不若柔從爲智偷安取容雖得此百數
亦何益國邪京風神峻整見者憚之目爲直御史未幾
論大臣除擬有私謫監興國軍鹽稅歷遷國子司業辭

不拜徽宗初立復命之踰月而卒

論曰陳薦等或由宮僚或由諫官皆歷侍從薦請罪薛
向黜李定王獵對典禮不阿非直臣哉齊恢莅民有惠
愛孫思恭未爲歐陽脩所知而力救其難非仁人哉皇
儲國本也老成腹心也臺諫耳目也周孟陽劉庠楊繪
朱京舉以爲言非嘉猷哉